



Arkivnr: 2015/11453-69
Saksbehandlar: Adeline Berntsen Landro

Saksframlegg

Saksgang

Utval	Saknr.	Møtedato
Hordaland fagskulestyre		16.02.2017

Forskrift om opptak, eksamen, disiplinære sanksjonar og klagehandsaming for Fagskolane i Hordaland

Samandrag

Endringane i fagskulelova av 1. juli 2016 gjev mellom anna føresegner om at styret for fagskulen skal vedta forskrift om opptak og eksamen. I tillegg vert det tilrådd at føresegner om disiplinære sanksjonar, klage og klagehandsaming vert nedfelt i forskrifta. På bakgrunn av dette er det utarbeidd ei forskrift for Fagskolane i Hordaland som baserer seg på aktuelle lover og forskrifter. Styret for Fagskolane i Hordaland må sende forskrifta på høyring, og deretter må ho kunngjerast hjå Lovdata.

Forslag til vedtak

Utkast til «Forskrift for opptak, eksamen, disiplinære sanksjonar og klagehandsaming» (forskrift for Fagskolane i Hordaland) vert sendt på open høyring med frist 03.04.2017 slik det går fram av saka.

Svein Leidulf Heggheim
fylkesdirektør opplæring
ansvarleg for saksførebuing til fagskulestyret

Linda Farestveit
seksjonsleiar skule

Saksframlegget er godkjent elektronisk og har derfor inga underskrift.

Vedlegg

- 1 Utkast til forskrift om opptak, eksamen, disiplinære sanksjonar og klagehandsaming for Fagskolane i Hordaland

Fylkesrådmannen, 01.02.2017

Endringane i fagskulelova av 1. juli 2016 gjev mellom anna føresegner om at styret for fagskulen skal vedta forskrift om opptak og eksamen. I tillegg vert det tilrådd at føresegner om disiplinære sanksjonar, klage og klagehandsaming vert nedfelt i forskrifta. På bakgrunn av dette er det utarbeidd ei forskrift for Fagskolane i Hordaland som baserar seg på aktuelle lover og forskrifter. Styret for Fagskolane i Hordaland må sende forskrifta på høyring, og deretter må ho kunngjerast hjå Lovdata. Utkast til «forskrift om opptak, eksamen, disiplinære sanksjonar og klagehandsaming for Fagskolane i Hordaland», med kortnamn «forskrift for Fagskolane i Hordaland», ligg som vedlegg til saka.

Utkast til forskrift er utarbeidd i samarbeid med fagskulane og juridisk kompetanse ved Opplæringsavdelinga. Utkastet er vesentleg endra i høve til studentreglementet, og det vert difor ikkje gjeve detaljert oversikt over kva som er endra, men det vert gjeve ei oppsummering av dei mest vesentlege endringane.

Vesentlege endringar

Det som er nytt i høve til tidlegare reglement, er at fagskulane kan krevje politiattest ved opptak til, eller i løpet av, utdanninga. Følgjande paragraf i utkast til forskrift omtalar dette:

§ 2-4 Krav til politiattest

- (1) Ved utdanningar der studentar kan kome i kontakt med mindreårige eller andre sårbare grupper som del av praksis eller klinisk undervisning, er det krav om at studenten legg fram politiattest ved opptak til eller i løpet av utdanninga, jf. fagskulelova § 12 og politiregisterlova § 39. Politiattesten skal vere slik som går fram av barnevernlova § 6-10 andre ledd. Krav om politiattest skal gjerast kjent for studenten ved opptak til studium som er omfatta av desse føresegnene.
- (2) Det er styret ved klagenemnda som fattar vedtak om at ein student skal misse retten til å delta i praksis eller klinisk undervisning basert på politiattest og innstilling frå rektor ved fagskulen. Studenten kan klage på vedtaket til Nasjonal klagenemnd for fagskoleutdanning. Sjå kap. 5. om klage og klagehandsaming.

Som ein les av paragrafen, vil denne vere relevant for helsefagskuleutdanningane, og Hordaland helsefagskole må utarbeide rutinar for å krevje inn politiattest for dei utdanningane som det er relevant for.

Vidare er det med bakgrunn i endringane i fagskulelova utarbeidd ein paragraf om skikkavurdering som følgjer:

§ 3-3 Skikkavurdering

- (1) Ved einskilde utdanningar skal fagskulen vurdere om studenten er skikka for yrket. Krav til skikkavurdering skal gå fram av studieplanen. Ei skikkavurdering skal verte gjennomført gjennom heile studiet og er ein føresetnad for at studenten skal få vitnemål for fullført utdanning, jf. fagskulelova § 11.
- (2) Det er styret ved klagenemnda som fattar vedtak om at ein student ikkje er skikka for yrket. Studenten har rett til å uttale seg før det vert gjort vedtak. Vert det fatta slikt vedtak, kan studenten verte utestengt frå utdanninga. Studenten kan klage på vedtaket til Nasjonal klagenemnd for fagskoleutdanning. Sjå kap. 4. om disiplinære sanksjonar og kap. 5. om klage og klagehandsaming.

Føresegner om skikkavurdering vil også hovudsakleg vere aktuelt for helsefagskuleutdanningane, og Hordaland helsefagskole må også lage rutinar for skikkavurdering ved utdanningar som vil vere omfatta av denne paragrafen.

Kunnskapsdepartementet har føreslått ei forskriftsendring i fagskuleforskrifta om politiattest, men denne er ikkje trådd i kraft enda. Kunnskapsdepartementet vil også lage ei forskrift eller eigne retningsliner for skikkavurdering, men det er ikkje klart når denne vil kome på høyring. På bakgrunn av moglege endringar i føresegner om politiattest og skikkavurdering vert det føreslått ein paragraf i forskrifta for Fagskolane i Hordaland som følgjer:

§ 6-1 Mindre endringar i forskrifta

- (1) Administrasjonen ved Opplæringsavdelinga i Hordaland fylkeskommune har rett til å gjere mindre endringar i denne forskrifta slik at den er i tråd med gjeldande lover og tilhøyrande forskrifter og krav som er sett fram av Nasjonalt organ for kvalitet i utdanningen (NOKUT).

På bakgrunn av § 6-1 vil det vere enklare å raskt følgje opp eventuelle endringar i gjeldande lover og forskrifter. Slike endringar vil likevel bli lagt fram for styret som melding.

Føresegner i studentreglementet som ikkje er med i forskrifta

Av di forskrifta skal omhandle opptak, eksamen, disiplinære sanksjonar og klagehandsaming, er det ein del føresegner som er nedfelt i studentreglementet som ikkje er med i utkastet til forskrift. Fagskolane i Hordaland må derfor lage eigne lokale reglement dersom føresegna skal vidareførast etter at forskrift for Fagskolane i Hordaland trår i kraft. Dette gjeld mellom anna fleire av §§ i **kapittel D. spesielle tilhøve** som til dømes føresegner om kontrakt, vernereglar, rusmidlar, skade på bygningar/eigedelar og studentpolitisk arbeid på skulen. Heile kapittel **H. Bruk av internett** er ikkje med i forskrifta.

Lenke til opphavleg studentreglement finn ein her: <http://www.hordaland.no/globalassets/for-skulane/fagskolane-i-hordaland/filer/reglement-fih-revidert-aug-2016.pdf>

Vidare saksgang

Etter handsaming i fagskulestyret 16.02.2017 vert forskrift for Fagskolane i Hordaland sendt på open høyring. Høyringsfrist vert føreslått sett til 03.04.2017, som er i overkant av 6 veker. Ein høyringsfrist kan ikkje vere mindre enn 6 veker. Høyringsutkastet vert sendt til aktuelle høyringspartar etter lista under og vert kunngjort på heimesida til Fagskolane i Hordaland. Etter høyringa vert det lagt fram ny sak og eventuelt revidert forskrift basert på høyringsuttalar for endeleg handsaming i fagskulestyret 05.05.2017. Når forskrift for Fagskolane i Hordaland er endeleg vedteken, vert dette kunngjort hjå Lovdata.

Forskrifta vert føreslått sendt på open høyring med følgjande spesifiserte høyringspartar:

Fagskolen i Hordaland
Hordaland helsefagskole
Studentrådet ved Fagskolen i Hordaland
Studentrådet ved Hordaland helsefagskole
Organisasjon for norske fagskolestudenter (ONF)
Fagskular
Råd for offentlige fagskoler (RFF)